



3. oktoberi 2016

UKA2016/52

Aatsitassarsiorfinni radiup qinngorneranik 60 ppm-inik akoqarnerusunik qalluiffiusuni aalajangersimasumik illoqarfinnut, nunaqarfinnut imeqarfinnullu tasernut 50 kilometerinik isumannaallisaanikkut killeqarfiliisoqarnissaanik Naalackersuisut ataatsimut aalajangersagaliornissamik peqquneqarnissaannik Inatsisartuni aalajangiiffigisassatut siunnersuut. Siunnersuummut atatillugu inatsisiliornikkut suliassat pisariaqartut kingusinnerpaamik UKA2017-imi saqqummiunneqassapput.
(Inatsisartunut ilaasortaq Aqqaluaq B. Egede, Inuit Ataqatigiit)

Inatsisartunut ilaasortaq Aqqaluaq B. Egede Inuit ataqatigiit siunnersuuteqarpoq Naalackersuisut peqquneqassasut aatsitassarsiorfinni radiup qinngorneranik 60ppm akoqarnerusunik aalajangersagaliortoqarnissaanik, tassalu imeqarfiit illoqarfiit nunaqarfiillu qanitaaniittunut killeqarfiliisoqarnissaanik 50-kilometerinik tamannalu oqaaseqarfigissavarput.

Nunatsinni pinngortitap paarilluarneqarnissaa, aammalu inuit atsitassarsiorfiit qanitaani najugallit illersorneqarnissaat isumannaatsumillu aatsitassarsiornikkut aamma ingerlatsivigineqarnissaat minnerunngitsumillu avatangiisit mianeralugit naasut uumasullu illersorneqarnissaat Partii Naleqqamiit soorunami pingaartilluinnarparput.

Aatsitassarsiornikkut nunatsinni misilittakkagut killeqartut oqaatigigaani ilumoorpoq. Tassami aatsitassarsiorfiit piiiaffiillu aallartikkaluannaq unittartut ukiuni makkunani kingullernilu misigiuannarpagut, tamannalu aningaasarsiornikkut suliffissatigullu annertusaaffissatut isumalluarfigalugit pisaneraluarnerput iluatsinngitsoorlugu qatangiinnartarnerat naammattoortualerparput tamannalu soorunami tamatsinnut ilungersunarpoq aningaasanimmi pisariaqartitsivugut.

Aatsitassarsiornikkut periarfissarpassuarnik oqariartortarnerput, aammalu iluanaarnissarsuarmik neriorsorneqartarnerput tamatigut piviusuunngitsoq takusarparput, soorunami tamanna nunamut aningaasanik pisariaqartitsisumut ilungersunarpoq, arlaatigullu aningaasarsiornikkut nukittorsaanngikkutta siunissami taamak ingerlaannarsinnaanngitsugut takusinnaavarput. Taavamiuna suniartugut uagutsinnut mattunniarpugut imaluunniit aatsitassarsiorfinnik nutaanik ammaaniarpugut?.

Aalisarnerinnarmimmi tungaveqarluni aningaasarsiorneq kisiat ingerlanniarsinnaanngilarput, periarfissat allat takornariartitsinerit aatsitassarsiornerillu soorlu nunaqarfiit isorliunerusullu takornariartitsinikkut piviusumik aallartinniartariaqalerpagut, tamakkulu aallartissagutsigit qanoq ikioqatigiissinnaavugut? Tassami ilaatigut qularnangilaq isummat aporfiit ilaat iisinnaasariaqassavagut. Aporfissalersuinikkummi nunarput aningaasarsiornikkut makitissinnaanngilarput, taamaattumik pitsaanerusutut isigaarput qanoq alloriarnissamut suleqatigiikkutta.

Aatsitassarsiorfiit aallartinneqartussat killilerlugit aallartittoqartalissappat taava ilaatigut annertuumik uagutsinnut mattussinnaasugut takusinnaavarput, ilaatigullu aatsitassarsiornissat amerlasuut mattutivinneqarsinnaallutik.

Tamannalu soorunami aatsitassanik pisuussutinik atuiniarnitsinnut isumammut naleqqutinngilaq, killiliinissaq pinngikkaluarlugu inatsisikkut isumannaatsumik ingerlasoqarnissaanik tunngaveqartumik nakkutigilluarneqartumik aqqissuussigutta alloriarnissaq pitsaanerpaajussasoq isumaqarpugut.

Killiliinissaq eqqunneqassappat nunatta sineriaani aatsitassarsiorfinnik nutaanik aammaasinnaanissaq ajornakusoortorujussuanngussaaq ajornarsivilluniluunniit, tamannalu aningaasarsiornikkut uagutsinnut oqimaarsaareersunut sulii ilungersunarnerulissasoq takusinnaavarput.

Aatsitassarsiornikkut isumannaatsumik qanoq suleqatigiissinnaanersugut aammalu isumannik aporfeqarut qanoq qaangerniarsinnaanerigut eqqartuiffigeqataarusupparput, soorunami pinngortitaq uumasut inuillu illersorneqarnissaat salliutillugu.

Taamatut oqaaseqarluta Aqqaluaq B. Egede Inuit ataqatigiit siunnersuutaata itigartinneqarnissaa oqatigissavarput.

Hans Enoksen